



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Joannis Pierii Valeriani Bellunensis Hieroglyphica, Sive De
Sacris Ægyptiorum Aliarumque Gentium Literis,
Commentariorum Libri LVIII**

Valeriano, Pierio

[Lipsiae] ; Francofurti Ad Moenum, 1678

Cortonenses.

urn:nbn:de:hbz:466:1-14259

A praestitere. Legimus enim Annibalem monstrasse Antiocho navali praelia pugnatura, ut in hostium classem vascula jacularentur Viperis plena, quarum metu perterriti hostes a dimicatione, & nauticis ministeriis impedirentur. Idem cum Prusias jam cedente classe sua fecisset, victor evasit. Antiquae vero illius militiae vestigia quaedam habentur apud vos Massas Romae, in Canone quodam circa Theodosii tempora, & aliquanto etiam prius confecto, in quo militum omnes ordines recensentur, gestaminaque ipsa suis etiam coloribus picta conspiciuntur, quae quisque manipulus turmaque, ex quadrupedibus vel alitibus, vel ex colorum varietate signa sibi desumpserunt: ex quibus, quae facerent ad Anguem, quoniam id operis ordo sibi deponere videbatur, subicere non importunum iudicavi.

SENIORES MENAPES. CAP. XVII.

EX his enim seniores Menapes dicti, Anguem luteum pro insigni habebant in parma viridi, cuius marginem ruber limbus ambibat. Umbilicus argenteus erat, circa quem luteus circumducebatur circulus. His autem Serpens terga inferne habebat, caput & caudam sursum versus inflectebat.

CORTONACENSES. CAP. XVIII.

Qui vero coloris albi Draconem praeferebant in rubra parma, cuius umbilicus erat argenteus, in margine vero circuli duo, quorum interior prasinus, albus exterior, ii Cortonacenses appellabantur, & cum superioribus utrique sub magistro peditum stipendia faciebant.

THAIPSALI. CAP. XIX.

Nam qui sub equitum Magistro militabant Thaipali (nisi codex in damno est, & Thessali, forte castior lectio sit) nuncupati, caeruleum gestabant Anguem, terga laevam versus porrigentem, in dexteram vero caput ad caudam incurvantem, qui gestis in Cortonacensibus diversus erat. Horum vero parma alba, umbilicus identidem argenteus, circum quem ruber ducebatur circulus. Inter caput & caudam Colubri, violaceus erat orbiculus.

PRAEFECTI FABRICAE. CAP. XX.

Inter gestamina vero Fabricae praefectorum, quae sex numero erant, dimidiatus Serpens luteus in horum uno conspiciebatur, parma caerulea, aureus umbilicus, margo ruber: intra quem a laeva parte, Onyx parvus cum Aethiops sigillo. Sequebantur ii virum illustrem, Magistrum officiorum appellatum.

SAGUNNENSES. CAP. XXI.

Sed Angues duo in huiusmodi militum gestaminibus colore rubro, sive, uti ex Ammiano diximus, purpureo, ad similitudinem X. Graecae litterae in transversum siti, in caerulea parma, cuius marginem ruber limbus circumdaret, eorum erat insigne, qui sub Magistro peditum merentes, Sagunenses appellabantur.

BIANENSES. CAP. XXII.

Humanicipitis autem Serpentis effigies, in caerulea parma ipse quoque unicolor, spiris duabus circa umbilicum aureum datis, capite eo humano superarrecto, & in aversum respiciente, cauda aliquantulum inferne summissa propendenteque gestabatur a militibus, qui sub Magistro militum per Illyricum merebant, Bianenses nuncupati.

HONORIANI JUNIORES. CAP. XXIII.

Erat inter hos quoque mutilati Serpentis insigne, cuiusmodi eorum habebatur, qui Honoriani juniores vocabantur. Serpentis id frustum luteum, totam fere parmam circumplexum. Inter caput & segmentum quadra erat & ipsa lutea, angulis in os & in caesuram versis, in qua tessala conspiciebatur purpurei coloris. Intra Anguem parma omnis rubra, extra tergum circulus albus ducebatur, umbilicus erat argenteus. Erant ii sub illustri viro equitum Magistro.

MARCOMANI. CAP. XXIV.

Sub eodem praefecto merebant & Marcomani, qui dimidium ipsi quoque Serpentem praeferebant coloris identidem lutei, in alba parma, cuius aureus erat umbilicus. Inter segmentum & caput lutea etiam lunula cernebatur adpicta.